

說  
郭

正  
八  
十

イ曾12  
6  
78



112  
6  
28



說部目錄

身第八十

風騷旨格

釋齊己

韻語陽秋

葛立方

藝苑雌黃

嚴有翼

譚苑醍醐

竹林詩評

謝氏詩源

潛溪詩眼

范温



本事詩 孟啓

續本事詩 聶奉先

風騷旨格

唐 齊巳



六詩

一曰大雅

一氣不言含有象萬靈何處謝無私

二曰小雅

天流皓月色池散芰荷香

三曰正風

都來消帝力全不用兵防

四曰變風

當道冷雲和不得滿郊芳艸即成空

五曰變大雅

蟬離楚樹鳴猶少葉到嵩山落更多

六曰變小雅

寒禽黏古樹積雪占蒼苔

詩有六義

一曰風

高齊日月方冥道動合乾坤始是心

二曰賦

風和日煖方開眼雨潤煙濃不舉頭

三曰比

丹頂西施頰霜毛四皓鬚

四曰興

水諸彭澤濶山憶武陵深

五曰雅

捲簾當白晝移榻對青山

又

遠道擎空鉢深山踏落花

六曰頌

君恩到銅柱蠻欵入交州

詩有十體

一曰高古

千般貴在無過達一片心閒不奈高

二曰清奇

未曾將一字容易謁諸侯

三曰遠近

已知前古事更結後人看

四曰雙分

船中江上景晚泊早行時

五曰背非

山河終決勝楚漢且橫行

六曰虛無

山寺鐘樓月江城鼓角風

七曰是非

須知項籍劍不及魯陽戈

八日清潔

大雪路亦宿深山水也齋

九日覆粧

叠巘供秋望無雲到夕陽

十日闔門

卷簾黃葉落鎖印子規啼

詩有十勢

獅子返擲勢

離情遍芳艸無處不萋萋

猛虎踞林勢

窓前閒詠鴛鴦句壁上時觀獬豸圖

丹鳳銜珠勢

正思浮世事又到古城邊

毒龍顧尾勢

可能有事關心後得似無人識面時

孤鴈失羣勢

詩闕

洪河側掌勢

風騷言格 八  
遊人微動水高听更生風

龍鳳交吟勢

崑玉已成廊廟器澗松猶是薜蘿身

猛虎投澗勢

仙掌月明孤影過長門燈暗數聲來

龍潛巨浸勢

養猿寒嶂疊擎鶴密林疎

鯨吞巨海勢

袖中藏日月掌上握乾坤

詩有二十式

一曰出入

雨漲花爭出雲空月半生

二曰高逸

夜過秋竹寺醉打老僧門

三曰出塵

逍遙非俗趣楊柳謾春風

四曰迴避

鳥正啼隋柳人須入楚山

五日並行

終夜冥心坐諸峰  
叫月猿

六日艱難

覓句如探虎  
逢知似得仙

七日達時

高松飄雨雪  
一室掩香燈

八日度量

應有冥心者  
還尋此境來

九日失時

高秋初雨後  
夜半亂山中

十日靜興

古屋無人到  
殘陽滿地時

十一日知時

前村深雪裏  
昨夜一枝開

十二日暗會

重城不鎖夢  
每夜自歸山

十三日直擬

禹力不到處  
河聲流向西



十四日返本

又因風雨夜重到古松門

十五日功勳

馬曾金鏃中身有寶刀

十六日拋擲

琴書留上國風雨出秦關

十七日背非

山河終決勝楚漢且橫行

十八日進退

日午遊都市天寒住華山

十九日禮義

送我杯中酒與君身上衣

二十日兀坐

自從青艸出便不下堦行

詩有四十門

一日皇道

明堂坐天子月朔朝諸侯

二日始終

風騷青柳  
養鷓成大鶴種子作高松

三日悲喜

兩行燈下淚一紙嶺南書

四日隱顯

道晦金鷄伏時來木馬鳴

五日惆悵

此別又千里少年能幾時

六日道情

誰來看山寺自是掃松門

七日得意

此生還自喜餘事不相侵

八日背時

白髮無心鑷青山得意多

九日正風

一春能幾日無雨亦多風

十日返顧

遠憶諸峰頂曾棲此性靈

十一日亂道

苦雨漲秋濤狂風翻野燒

十二日抱直

須知三尺劍只爲不平人

十三日世情

要路爭先進閒門肯暫過

十四日康救

傍人皆默語當路好隄防

十五日貞孝

無家空託墓主祭不從人

十六日薄情

君恩秋後薄日夕向人疎

十七日忠正

敢將心爲主豈懼語從人

十八日相成

怪得登科晚須逢聖主知

十九日嗟歎

淚流襟上血髮變鏡中絲

二十日俟時

明主未巡狩白頭猶釣魚

二十一日清苦

在處人投卷移居雨着衣

二十二日騷愁

已難消永夜況復聽秋霖

二十三日睽戀

欲起游方興重來遠塔行

二十四日想像

溪霞流火色松月照蟾光

二十五日志氣

未拋先達路難作便歸人

二十六日雙擬

瞑目瞑心坐花開花落時

二十七日向時

黑壤生紅木黃猿領白兒

二十八日傷心

六國空流血孤祠掩落花

二十九日監戒

因思後庭曲懶上景陽樓

三十日神仙

一爲嵩岳客幾喪洛陽人

三十一日破除

大都時到此不是世無情

三十二日蹇塞

氣蒸垂柳重寒勒牡丹遲

三十三日鬼怪

山魅隔窓舞鵬鳥入簾飛

三十四日絀絀

日落川未上烏棲人獨行

三十五日世變

如何人少重都爲帶寒開

三十六日風雅

日落無行客天寒有去鴻

三十七日嗟歎

拭淚沾襟血梳頭滿面絲

三十八日是非

須知項籍劍不及魯陽戈

三十九日禮義

送我杯中酒與君身上衣

四十日清潔

大雪路亦宿深山水也齋

詩有六斷

一日合題

可憐半夜嬋娟月正對五侯煠酒卮

二日背題

尋常風雨夜應有鬼神看

三日卽事

翻嫌易水上細碎動離寬

四日因起

閒尋古廊畫記得列仙名

五日不盡意

此心只在相逢說時復登樓看遠山

六日取時

西風起邊鴈一一向瀟湘

詩有三格

一曰上格用意

那堪懷遠道猶自上高樓

又

九江有浪船難濟三峽無猿客自愁

二曰中格用氣

直饒人買去還向柳邊栽

又

四海魚龍精鬼冷三山鸞鳳骨毛寒

三曰下格用事

片石猶臨水無人把釣竿

又

一輪湘渚月萬古獨醒人

韻語陽秋

丹陽葛立方

陶潛謝朓詩皆平淡有思致非後來詩人怵心劇目雕琢者所爲也老杜云陶謝不枝梧風騷共推激紫燕自超詣翠駿誰翦剔是也大抵欲造平淡當自組麗中來落其華芬然後可造平淡之境如此則陶謝不足進矣今之人多作拙易詩而自以爲平淡識者未嘗不絕倒也梅聖俞和晏相詩云因今適性情稍欲到平淡苦詞未圓熟刺口劇菱芡言到平淡處甚



難也所以贈杜挺之詩有作詩無古今欲造平淡難之句李白云清水出芙蓉天然去雕飾平淡而到天然處則善矣

老杜寄身於兵戈騷屑之中感時對物則悲傷係之如感時花濺淚是也故作詩多用一自字田父泥飲詩云步屨隨春風村村自花柳遣懷詩云愁眼看霜露寒城菊自花憶弟詩云故園花自發春日鳥還飛日暮詩云風月自清夜江山非故園滕王亭子云古牆猶竹色虛閣自松聲古人情對境自有悲喜而初不能累無情之物也

杜甫觀安西過兵詩云談笑無河北心肝奉至尊故東坡亦云似聞指揮築上郡已覺談笑無西戎蓋用左太冲詠史詩長嘯激清風志若無東吳也王維云虜騎千重只似無句則拙矣

杜甫客夜詩云客睡何曾着秋天不肯明陪王使君泛江詩云山谿何時斷江平不肯流不肯二字含蓄甚佳故杜兩言之與淵明所謂日月不肯遲四時相催迫同意

韻言隱和  
退之贈崔立之前後各一篇皆譏其詩文易得前語  
曰才豪氣猛易語言往往蛟螭雜螻蛄後詩曰文如  
翻水成初不用意爲二詩皆數十韻豈非欲銜博於  
易語言之人乎前詩曰深藏篋笥時一發戢戢已多  
如束筍後詩曰每每遺我書竟歲無差池有以知崔  
於韓情義之篤如此也

選詩駢句甚多如宣尼悲獲麟西狩涕孔丘千憂集  
日夜萬感盈朝昏萬古陳往還百代勞起伏多士成  
大業羣賢齊洪績之類恐不足爲後人之法也

韋應物詩平平處甚多至於五字句則超然出於哇  
逕之外如遊溪詩野水烟鶴唳楚天雲雨空南齋詩  
春水不生烟荒崗筠翳石詠聲詩萬物自生聽太空  
常寂寥如此等句豈下於兵衛森畫戟燕寢凝清香  
哉故白樂天云韋蘇州五言詩高雅閑淡自成一家  
之體東坡亦云樂天長短三千首却遜韋郎五字詩  
孟郊詩楚山相蔽虧日月無全輝萬株古標根擎此  
磷磷溪大行橫偃脊百里芳崔嵬等句皆造語工新  
無一點俗韻然其他篇章似此處絕少也李觀評其

詩云高處在古無上平處下觀二謝許之亦太甚矣東坡謂初如食小魚所謂不償勞又似食蟭蟣竟日嚼空螯貶之亦太甚矣

蔡君謨娶余祖姑清源君已而赴漳南幕余曾祖通議贈之詩曰藻思舊傳青管夢指科新試碧雞才且依仲寶蓮花幕更下溫郎玉鏡臺可謂佳句矣韓退之送陸暢詩云一來取高第官佐東宮軍迎婦丞相府誇映秀士羣鳴鸞桂樹間觀者何繽紛此二詩事相類而語皆奇也

錢起集前八卷後五卷鮑欽止謂昭宗時有中書舍人錢珣亦起之諸孫今起集中恐亦有珣所作者余初未知其所據也比見前集中有同程七早入中書一篇云不意雲霄能自致空驚鴛鴦忽相隨鵬雪新晴栢子殿春風欲上萬年枝和王負外雪晴早朝云紫微晴雪帶恩光遶仗偏隨鴛鴦行長信月留寧避曉宜春花滿不飛香二詩皆珣所作無疑蓋起未嘗入中書也集中又有登彭祖樓一詩而薛能集亦載則知所編甚駁也

龍言陽秋  
王仲至嘗奉使過仇池有九十九泉萬山環之老杜  
仇池詩乃謂迤接西南境長懷十九泉何耶

常應物聽嘉陵江聲云水性自云靜石中本無聲如  
何兩相激雷轉空山鳴贈李儋云絲桐本異質音響  
合自然吾觀造化意二物相因緣二詩意頗相類然  
應物未曉所謂非因非緣亦非自然者

高適別鄭處士云興來無不愜才大亦何傷寄孟五  
詩云秋氣落窮巷離憂兼暮蟬送蕭十八云常苦古  
人遠今見斯人古題陸少府書齋云散帙至棲鳥明

灯畱故人皆佳句也上陳左相云天地莊生馬江湖  
范蠡舟亦有含蓄但莊子謂天地一指萬物一馬而  
以天地爲馬悞矣

晉張翰憶吳中蓴菜鱸膾而歸而高適屢作越上用  
如送崔功曹赴越云今朝欲乘興隨爾食鱸魚送李  
九赴越云鏡水若所憶蓴莢子舊便人以爲疑余考  
地里志漢吳縣隸今會稽郡則以鱸魚作越上亦無  
傷也

魯直謂東坡作詩未知句法而東坡題魯直詩云每

見魯直詩未嘗不絕倒然此卷語妙甚殆非悠悠者可識能絕倒者已是可人又云讀魯直詩如見魯仲連李太白不敢復論鄙事雖若不用然不爲無補如此題識其許之乎其譏之也魯直酷愛陳無已詩而東坡亦不深許魯直爲無已揚譽無所不至而無已乃謂人言我語勝黃語何耶

余讀許渾詩獨愛道直去官早家貧爲客多之句非親嘗者不知其味也贈蕭兵曹詩云客道耻搖尾皇恩寬犯鱗直道去官早之實也將離郊園詩云久貧辭國遠多病在家希貧爲客多之實也

錢起與郎士元齊名時人語曰前有沈宋後有錢郎然郎豈敢望錢哉起中書遇雨詩云雲衒七殿起雨拂九門來宴李監宅云晚鍾過竹靜醉客出花遲罷官後云秋堂入闕夜雲月思離居對雨云生事萍無定愁心雲不開亦可謂奇句矣士元詩豈有如此句乎贈蓋少府新除江南尉云客路尋常隨竹影人家大抵傍山嵐題王季友半日村別業云長溪南路當羣岫半景東鄰照數家此何等語余讀其詩盡快朱

韻言陽秋  
見有可喜處以是知不及起遠甚

孟郊詩云借車載家具家具少於車借者莫彈指貧窮何足嗟可見其素窶後有詩云賓秩已覺厚私儲常恐多是古人恐富求歸之義則貧亦何足怪按郊爲溧陽尉縣有投金瀨平陵城林薄翁蔚郊往來其間曹務都廢至遣假尉代之而分其半俸則安得有私儲哉退之贈郊詩云陋室有文史高門有笙竽何能辨榮辱直欲分賢愚蓋言貧者文史之樂賢於富者笙竽之樂也

東坡詩云玉奴絃索花奴手玉奴謂楊妃花奴謂汝陽王璉也及觀和楊公濟梅花詩乃言玉奴終不負東昏何耶按南史東昏妃潘玉兒當是筆悞爾

唐人與親別而復歸謂之拜家慶盧象詩云上堂家慶畢顧與親恩邇孟浩然詩云明朝拜家慶須着老萊衣

晉嵇康贈弟秀才四言詩云感悟馳情思我所欽則以所欽爲弟陸機贈從兄車騎詩云寤寐靡安豫願言思所欽則以所欽爲兄又贈馮文熊詩云慷慨誰

爲感願言懷所欽則以所欽爲友

白樂天詩多說別花如紫微花詩云除却微之見應  
愛世間少有別花人薔薇花詩云移他到此須爲主  
不別花人莫使看今好事之家有奇花多矣所謂別  
花人未之見也鮑溶作仙檀花詩寄袁德師侍御有  
欲求御史更分別之句豈謂是耶

元微之謫通州白樂天有詩云寅年離下多逢虎亥  
日沙頭始賣魚後人有東南行云亥日饒蝦蟹寅年  
足虎羆張籍云江村亥日長爲市山谷亦有魚收亥

日妻到市之句

凡物皆可占非特著龜也市中亦有聽聲而知禍福  
者莫知其所自余觀王建集有聽鏡詞云重重塵拭  
嫁時鏡夫婿遠行憑鏡聽豈今聽聲之類耶大涅槃  
經云不以瓜鏡芝草楊枝鉢盂髑髏而作卜筮則鏡  
能占卜信矣

楞蒲用博齒五枚如銀杏狀各上黑下白內取二黑  
刻爲犢其背刻爲雉故李翱五木經云楞蒲五木黑  
白判厥二作雉背作牛是也以盧白雉犢四爲王采

韻語陽秋 八  
取其全它八采爲疇者惡其駁也按前史三擲三盧如慕容寶五擲五盧如李安人王思政之擲印爲盧劉裕之喝盧勝雉皆以爲前途富貴之先兆卒之其應如響亦可謂異矣鄭谷詩云能消未日是樗蒲坑塹由來似宦塗兩擲未離操楸內坐中何惜爲呼盧然盧可呼而得官可倖而致乎觀谷此言似未知安時處順者

楚詞云篋蔽象碁有六博些分曹並進遞相迫些王逸謂投六著行六著故謂之六博言以篋路作箸象牙爲碁也而楚詞補注乃引列子擊博樓上謂擊打也如今之雙陸碁也予謂雙陸之制初不用碁俱以黑白小棒槌每邊各十二枚主客各一色以骰子兩隻擲之依點數行因有客主相擊之法故趙搏雙陸詩云紫牙鏤合方如斗二十四星銜月口貴人迷此華筵中運木手交如陣鬪今六博旣行六碁則非雙陸明矣

帝王世紀及逸士傳載帝堯之時天下太和有八九十老人擊壤而歌於康衢其詞云日出而作日入而



息鑿井而飲耕田而食帝何力於我哉初不知壤爲何物因觀藝經云壤以木爲之前廣後銳長尺四寸闊三寸其形如履將戲先側一壤於地遠三四十步以手中壤擊之中者爲上蓋古戲也韓退之於崔立之厚矣立之所厚於退之者宜如何然集中所答三詩皆未有慰薦之意何邪其曰幾欲犯顏出薦口氣象硃矸未可攀又云東馬巖徐已奮飛枚臯卽召窮且忍知識當要路正賴汲引隱情惜已殆同寒蟬古人之所惡也

今之新進士不問科甲高下唱名出皇城則例喝狀元莫知其端唐鄭谷登第後宿平康里嘗作詩曰春來無處不閑行楚潤相看別有情好是五更殘酒醒耳邊聞喚狀元聲則新進士例呼狀元舊矣鄭谷趙昌翰榜第八名也

秦太虛舉進士不得東坡詩曰底事秋來不得解定中試與問諸天深爲稱屈也李方叔省試不得第而東坡領貢舉嘗有詩贈之云平生謾說古戰場過眼常迷日五色我慙不出君大笑行止皆天子何責山

韻言陽秋  
谷和云今年持橐佐春官遂失此人難容責座主歸過於已門生歸命於天俱一世之賢也

文闈有挾書傳義之禁舊矣竊怪李揆爲考官大陳經史於庭令學者縱觀和凝爲考官開門徹棘令學者自便如此則真賢實能孰辨耶予知其故矣蓋自唐以來主司重素望故文場一啟而投卷紛然舉子之升黜固自有定議矣雖禁挾書傳義奚爲哉朝向公卿說暮向公卿說誰謂黃鍾化爲君子舌此孟郊有所於知己也而呂渭取之擬動如浮海凡言似課

詩終身事知己此後復何爲此杜荀鶴有所於知己也而裴贇取之砌下芝蘭新滿徑門前桃李舊垂陰却應回念江邊草放出春烟一寸心此鄭谷有所於知己也而柳玘取之舉子祈之於前主司錄之於後公論何在乎長慶初錢徽爲考官取鄭明等三十三人以所取不當再命白居易試孤竹管賦試者皆不知本事逐落十一人而錢徽貶江州刺史當時詔書以謂浮薄之徒扇爲朋黨干撓主司每歲策名無不先定則陳書徹棘之舉殆無足怪也

酒之種類多矣有以綠爲貴者白樂天所謂傾如竹葉盈尊綠是也有以黃爲貴者老杜所謂鶯兒黃似酒是也有以白爲貴者樂天所謂玉液黃金卮是也有以碧爲貴者老杜所謂重碧醅新酒是也有以紅爲貴者李賀所謂小槽酒滴珍珠紅是也今閩廣間所釀酒謂之紅酒其色殆類胭脂西陽雜俎載賈瑤家蒼頭能別水常乘小艇於黃河中以瓠匏接河源水以釀酒經宿色如絳名爲崑崙觴是又紅酒之尤也

蜀中食品南方不知其名者多矣而况其味乎東坡所謂豆莢圓且小槐牙細而豐者巢菜也所謂贈君木魚三十尾中有鶯黃子魚子者櫻筍也是二物者蜀川甚貴重東坡在黃州時去鄉已十五年思巢菜而不可得會巢元修自蜀來使歸致其子而種之東坡之下又作櫻筍酢浸蜜漬可致千里外嘗以餉殊長老則此二物之珍可知矣蒟醬蜀醬也蜀都賦所謂蒟醬流味是也苞蘆蜀鮓也老杜所謂香飯兼苞蘆是也

陶淵明乞食詩云饑來驅我去不知竟何之而繼之以感子漂母惠愧我非韓才則求而有所獲者也杜子美上水遣懷云驅馳四海內童稚日糊口而繼之以但遇新少年少逢舊知友則求而無所得者也山谷貧樂齋詩云饑來或乞食有道無不可過青草湖云我雖貧至骨猶勝杜陵老憶昔上岳陽一飯從人討由是論之則杜之貧甚於陶而山谷之貧尚優於杜也

白樂天號爲知理者而於仕宦升沉之際悲喜輒係之自中書舍人出知杭州未甚左也而其詩曰朝從紫禁歸暮出青門去又曰委順隨行止又曰退身江海應無用憂國朝廷自有賢自江州司馬爲忠州刺史未爲超也而其詩曰正聽山鳥向陽眠黃紙除書落枕前又云五十專城未是遲又云三車猶夕會五馬已晨裝及被召中書則曰紫微今日煙霄地赤嶺前年泥土身得水魚還動鱗鬣乘軒鶴亦長精神觀此數詩是未能忘情於仕宦者東坡謫瓊州有詩云平生學道真實意豈與窮達俱存亡要當如是爾

柳展如東坡甥也不問道於東坡而問道於山谷山谷作八詩贈之其間有寢興與時俱由我屈伸肘飯羹自知味如此是道否之句是告之以佛理也其曰咸池浴日月溪宅養靈根胸中浩然氣一家同化元是告之以道教也聖學魯東家恭惟同出自乘流去本遠遂有作書肆是告之以儒道也

王勃示知己詩云客書同十奉臣劔已三奔則不爲無意於功名者夢游仙詩云乘月披金枝二星解瓊珮則不爲無意於神仙者是以登牛頭山而思武侯

之功宿仙居觀而思霓衣之侶也又觀述云擬古詩云僕生二十祀有志十數年下策圖富貴上策懷神仙而二志竟不遂可勝嘆哉

王維因鼓琴輪袍登第而集中無琵琶詩畫思入神山水平遠雲勢石色繪者以爲天機所到而集中無畫詩豈非藝成而下不欲言耶抑以樂而娛貴主以畫而奉崔圓而不欲言耶

藝苑雌黃

宋 嚴有翼

金錯刀

張平子四愁詩云美人贈我金錯刀何以報之英瓊  
 瑤金錯刀王莽所鑄錢名莽居攝變漢制以周錢有  
 子母相權於是更造大錢徑寸二分重十二銖文曰  
 大錢五十又造契刀其環如大錢身形如刀長二寸  
 文曰契刀五百錯刀以黃金錯其文曰一刀直五千  
 與五銖錢凡四品並行杜子美對雪詩金錯囊徒罄

銀壺酒易賒韓退之潭州泊船聞道松醪賤何須恡  
錯刀皆謂是也或注四愁詩引續漢書佩刀諸侯王  
以金錯環恐與王莽所鑄錯刀又別

### 豪句

吟詩喜作豪句須不畔於理方善如東坡觀崔白驟  
雨圖云扶桑大繭如甕盎天女織綃雲漢上往來不  
遣鳳銜梭誰能鼓臂投三丈此語豪而甚工石斂若  
橘林文中詠雪有燕南雪花大於掌冰柱懸簷一千  
丈之語豪則豪矣然安得爾高屋李太白北風衍云  
燕山雪花大如席秋浦歌云白髮三千丈其句可謂  
豪矣奈無此理何如秦少游秋日絕句云連卷雌蜺  
柱西樓逐雨追情意未休安得萬粧相向舞酒酣聊  
把作纏頭此語亦豪而工矣

### 燕幕

吳公子札聘于上國宿于戚聞孫林父擊鍾曰夫子  
之在此猶燕之巢于幕上夫幕非燕巢之所言其至  
危也故潘岳西征賦云危素卵之累殼甚玄燕之巢  
幕丘希範與陳伯之書云將軍魚遊沸鼎之中燕巢

飛幕之上不亦惑乎蓋用此意後人因此言燕事多  
使巢幕似乎無謂謝宣遠九日從宋公集戲馬臺詩  
巢幕無留燕遵渚有來鴻杜子美對雨書懷詩震雷  
翻幕燕驟雨落河魚

以宰爲命

王儉少年以宰爲命嘗有詩云稷契康虞夏伊呂翼  
商周又字其子曰元成取仍世作相之義至其孫訓  
亦作詩云且爽康世巧蕭曹佐毗俗大率追儉之意  
而爲之後官亦至侍中

寂善下字

予與翁行可同舟沂汴因談及詩行可云王介甫寂  
善下字如荒埭暗鷄催月曉空場老雉挾春驕下得  
挾字寂好如孟子挾長挾貴之挾予謂介甫又有紫  
莧凌風怯蒼苔挾雨驕陳無巳有寒氣挾霜侵敗絮  
賓鴻將子度微明其用挾字正與王介甫前一聯同

河豚

河豚有大毒肝與卵人食之必食瀾而爲羹或不甚  
熟亦能害人歲有被毒而死者然南人嗜之不巳故



聖俞詩云炮煎苟失所入喉爲鏌鋸則其毒可知

### 草詞

張子野過和靖隱居有詩一聯云湖山隱後家空在  
煙雨詞亡草自青注云先生常著春草曲有滿地和  
煙雨之語今亡其全篇余按楊元素本事曲有點絳  
唇一闋乃和靖草詞云金谷年年亂生春色誰爲主  
餘花落處滿地和煙雨又離歌一闋長亭暮王孫去  
萋萋無數南北東西路此詞甚工子野乃不見其全  
篇何也

### 奪胎換骨

前輩云詩有奪胎換骨之說信有之也杜陵謁玄元  
廟其一聯云五聖聯龍袞秋風折鴈行亦以鴈行對  
龍袞然語中的其親切過于本詩茲不謂之奪胎可  
乎不然則徒用前人之語殊不足貴且如沈佳期云  
小池殘暑退高樹早涼歸非不佳也然正用柳惲太  
液澱澱起長楊高樹秋之句耳蘇子云峽東滄澗深  
貯月巖排紅樹巧粧秋非不佳也然正用杜陵峽東  
滄江起岩排石樹圓之句耳語雖工而無別也

譚苑醍醐

闕名

總論

蕭穎士曰六經之後有屈原宋玉文甚雄壯而不能  
經賈誼文辭最正近於治體枚乘相如亦瓌麗才士  
然而不近風雅楊雄用意頗深班彪識理張衡宏曠  
曹植豐贍王粲超逸嵇康標舉左思詩賦有雅頌遺  
風于寶著論近王化根源此後夔絕無聞焉近日惟  
陳子昂文體最正蕭之所取此可以知其所養矣

庾詩

庾信之詩爲梁之冠絕啓唐之先鞭史評其詩曰綺  
艷杜子美稱之曰清新又曰老成綺艷清新人皆知  
之而其老成獨子美能發其妙余嘗合而衍之曰綺  
多傷質艷多無骨清易近薄新易近尖子山之詩綺  
而有質艷而有骨清而不薄新而不尖所以爲老成  
也若元人之詩非不綺艷非不清新而乏老成宋人  
詩則強作老成態度而綺艷清新槩未之有若子山  
者可謂兼之矣不然則子美何以服之如此

猛燭

魏明帝樂府畫作不停手猛燭繼望舒晉庾闡藏闡  
賦督猛炬以增明從因朗而心隔猛炬猛燭蓋炬燭  
大炬也周禮所謂墳燭楚辭所云懸火也杜詩銅盤  
燒蠟光吐日其猛蠟乎

亭映

梁元帝纂要云日在午日亭在未日映王仲宣詩山  
岡有餘映謂日昃也

斗音

古文易曰中見斗斗作主鄭玄注詩酌以大斗斗亦音主儀禮司宮設罍於洗東有枓釋之枓音主注枓斛水器也律歷志聚于斗溝洫志涇水一石其泥數斗且澆且糞長我禾黍

古歌詞

古歌詞長安城西雙員關上有一雙銅雀宿一鳴五谷生再鳴五穀熟今文選注所引遺一宿字遂不可韻難讀

古諺

左傳唇亡齒寒蓋古諺也戰國策作唇揭齒寒揭與寒叶韻

翻案

謝靈運詩曉聞夕颺急晚見朝日暎此語殊有變互凡風起必以夕此云曉聞夕颺卽杜子美之喬木易高風也晚見朝日倒景反照也孟郊詩南山塞天地日月石上生高峯夕駐景溪谷夜先明皆自謝詩翻出

晉齊

孟喜易晉作齊陸德明云齊子西切義同蓋音躋躋亦晉也故知義同春秋齊師遷紀邢部部鄆子移反文選弦高犒晉師注引呂氏春秋秦將伐鄭賈人弦高遇之乃矯鄭伯之命以勞之曰寡君使丙也術也視也於邊侯瞻之道也迷惑入大國之地再拜受之高誘曰瞻國名按瞻鄆同字从邑爲是从口傳寫誤也古但作晉而音子西反與易春秋合

顏謝

顏延之謝靈運各被斤擬北上篇延之受語卽成靈運久而方就遲速不同不害其俱工也

竹林詩評

闕名

韋孟四言誹而不亂小雅之流風也

蘇武之作稱爲高古非清廟之瑟朱絲疏豁一唱二和更無可喻之

張衡四愁遙衷耿慕猶風騷之遺韻也

趙壹傷彼時二首載於史傳詩家之賈誼乎

曹子建之作亦正亦變駸駸乎大雅之製焉

王粲之作如梗柎杞梓輪囷離奇夫豈細材哉

劉楨之作朗潤清越如擬金考石故宜稱於建安  
陶潛之作如清瀾白鳥長林麋鹿雖弗嬰籠絡可與  
其潔而隱顯未齊厭欣猶滯直適乎此而不能忘隘  
乎彼者耶

二陸之作辭氣重厚有館閣之體盛唐諸家應制多  
出此

顏延年之作如般般之獸白質黑章收收穆穆君子  
之態

鮑照之作如珊瑚琅玕木難火齊弗資鏤琢而自足

備觀至乃詩家以太白方其俊逸豈小小哉

謝朓之作如西山清曉霏藍翕黛之中時有爽氣

王融作遊仙詩如金莖百尺仙掌銅盤集沆瀣於中

天倚清寒而獨矯也

沈約范雲之作如閶闔踈鍾建章清漏不棘不舒有  
節有度

江淹清婉秀麗才思有餘雜擬之作如季札聘魯四  
代之樂竝歌于庭非天下之至聰其孰能喻

丘遲之作如琪樹玲瓏金芝布濩九霄春露二島秋

雲

何遜之作不費氣力如庖丁解牛風成於騫然

陰鏗之作體用兼優神采融澈辭精意切名之弗浮也

徐陵之作如魚油龍鱗列堞明霞輝燿丰茸之采溢目非頓載之室詎得見此

庾信之作如玉臺九成瓊樓數仞規模崇麗氣象清新步虛諸什並懸絕塵境

虞世南之作如高山欄具蒼佩華纓廊廟之容也李百藥陳叔達楊師道實可與分庭抗禮者焉

阮藉之作如剡溪雪夜孤楫沿流乘興而來興盡而已也

謝靈運之作如森蔚璀璨而鋪叙紛縟處似急就篇



謝氏詩源

闕名

昔有姜氏與鄰人文冑通屢勤文冑以百鍊水晶針  
一函遺姜氏姜氏啓履箱取連理線貫雙針結同心  
花以荅之故定情篇曰素縷連雙針

博物志云上芝爲車馬故樂府云芝爲車

堂北曰背堂南曰襟故陸士衡詩曰焉得忘歸草言  
樹背與襟言前後皆樹庶與其忘也

宋遷寄試鶯詩有云誓成烏鰂墨人似楚山雲人多

不解烏鰂義南越志云烏鰂懷墨江東人取墨書契  
以給人物逾年墨消空紙耳

昔有客過茅君時當大暑茅君子手巾內鮮茶葉人  
與一葉客食之五內清涼異而詰其所從來茅君曰  
此蓬萊山穆陀樹葉衆仙食之以當飲又有寶文之  
蔬服之不饑謝幼貞詩曰摘寶文之初蔬拾穆陀之  
墜葉

漢有女子舒襟爲人聰慧事事有意與元羣通嘗寄  
羣以蓮子曰吾憐子也羣曰何以不去心使婢荅曰  
正欲汝知心內苦故後世子夜歌有見蓮不分明等  
語皆祖其意

杜康造酒因名酒曰杜康故魏武短歌行曰何以解  
憂惟有杜康

近有士子作游女詩中一聯云不曾憐玉笋相競採  
金鹽人多不解金鹽二字余近讀荑石經云五加皮  
一名金鹽始知玉笋金鹽對極妙而初不合掌

灼灼與河東人神通日授不復可見以軟絹帕裹紅  
淚寄之後姚鶯有秋閨詩曰菊花人共瘦楓葉淚俱

紅

袁瓘秋日詩曰芳艸不復綠王孫今又歸人都不解  
施廕見之曰王孫蟋蟀也

袁瓘爲施廕作古硯歌中有句云青州熟鉄不足數  
衛公結隣差可方古有青州熟鉄硯甚發墨

李夫人着繡襦作合歡廣袖故羽林郎曰廣袖合歡  
襦

金母召羣仙宴于赤水命謝長珠鼓拂雲之琴舞驚  
波之曲坐有碧金鸚鵡杯白玉鸚鵡杓杯乾則杓自

挹欲飲則杯自舉故太白詩云鸚鵡杓鸚鵡杯非指  
廣南海螺杯杓也

姑蘇城中皮日休市有小橋名鶴舞父老相傳吳時  
有二鶴在其地對舞已而飛集金昌門外青楓橋東  
化爲鳳凰飛入雲際今鳳凰橋是也沈學士詩曰不  
如雙白鶴對舞石橋邊謝侍郎詩曰願作江頭雙鳳  
凰奮飛直向青雲裏是一事

蘇味道詩火樹銀花合人謂銀花卽火樹中花光明  
如銀故曰銀花殊不知銀花亦自有本昔薛瓊至孝

謝曰言流  
父病嘗其嫂而家甚貧嘗出求薪遇老父以一物與  
之曰此銀實也用四壁土種之銅盆中置臥床下當  
得銀足贍汝家瓊歸如言種之旬日發苗又旬日生  
花花有銀色若鈿螺及結實皆銀也

更羸之妻能作鎖雲囊佩之陟高山有雲處不必開  
囊而自然有雲氣入其中歸至家啟視皆有雲氣白  
如綿自囊而出囊大如蠶繭而可以開合更羸善射  
每言能仰射入雲中其妻不信因以一囊繫箭頭令  
射之及墜驗之果有白雲在內因名箭曰鎖雲故子

美詩曰翻身向天仰射雲

輕雲鬢髮甚長每梳頭立于榻上猶拂地已縮髻左  
右餘髮各粗一指結束作同心帶垂于兩肩以珠翠  
飾之謂之流蘇髻于是富家女子多以青絲效其制  
亦自可觀

潛溪詩眼

宋 范溫

櫻桃詩

老杜櫻桃詩云西蜀櫻桃也自紅野人相贈蒲筠籠  
數回細寫愁仍破萬顆勻圓訝許同此詩如禪家所  
謂信手拈來頭頭是道者直書目前所見平易委曲  
得人心所同然但他人艱難不能發耳至於憶昨賜  
霑門下省退朝擎出大明宮金盤玉筋無消息此日  
嘗新任轉蓬其感興皆出於自然故終篇道麗韓退

灌溪詩集  
之有賜櫻桃詩云漢家舊種明光殿炎帝還書本艸  
經豈似滿朝承雨露共看轉賜出青冥香隨翠籠擎  
偏重色照銀盤寫未停食罷自知無補報空然慙汗  
仰皇扃蓋學老杜前詩然搜求事跡排比對偶其言  
出於勉強所以相去甚遠若非老杜在前人亦安敢  
輕議

橄欖詩

東坡橄欖詩云紛紛青子落紅鹽氣味森森苦且嚴  
待得微甘回齒頰已輸崖蜜十分甜范景仁言橄欖

木高大難采以鹽擦水身則其實自落所以有落紅  
鹽之語南人誇橄欖北人誇棗

都梁香

古詩云博山爐中百和香鬱金蘇合及都梁又云氎  
氎五水香迷迭及都梁按廣志都梁香出交廣形如  
藿香迷迭出西域魏文帝有迷迭香賦

本事詩

唐 孟啟

情感第一

陳太子舍人徐德言之妻後主叔寶之妹封樂昌公主才色冠絕時陳政方亂德言知不相保謂其妻曰以君之才容國亡必入權豪之家斯永絕矣儻情緣未斷猶冀相見宜有以信之乃破一鏡人執其半約曰他日必以正月望日賣於都市我當在卽以是日訪之及陳亡其妻果入越公楊素之家寵嬖殊厚德

言流離辛苦僅能至京遂以正月望日訪於都市有  
蒼頭賣半鏡者大高其價人皆笑之德言直引至其  
居設食具言其故出半鏡以合之仍題詩曰鏡與人  
俱去鏡歸人不歸無復嫦娥影空留明月輝陳氏得  
詩涕泣不食素知之愴然改容卽召德言還其妻仍  
厚遺之聞者無不感歎仍與德言陳氏偕飲令陳氏  
爲詩曰今日何遷次新官對舊官笑啼俱不敢方驗  
作人難遂與德言歸江南竟以終老

唐武后載初中左司郎中喬知之有婢名窈娘藝色  
爲當時第一知之寵待爲之不婚武延嗣聞之求一  
見勢不可抑旣見卽留無復還理知之憤痛成疾因  
爲詩寫以縑素厚賂閹守以達窈娘得詩悲惋結於  
裙帶赴井而死延嗣見詩遣酷吏誣陷知之破其家  
詩曰石家金谷重新聲明珠十斛買娉婷昔日可憐  
君自許此時歌舞得人情君家閨閣不曾難好將歌  
舞借人看富貴雄豪非分理驕奢勢力橫相干別君  
去君終不忍徒勞掩袂傷紅粉百年離別在高樓一  
旦紅顏爲君盡時載初元年三月也四月下獄八月



死

寧王曼貴盛寵妓數十人皆絕藝上色宅左有賣餅者妻纖白明媚王一見注目厚遺其夫取之寵惜逾等環歲因問之汝復憶餅師否默然不對王召餅師使見之其妻注視雙淚垂頰若不勝情時王座客十餘人皆當時文士無不悽異王命賦詩王右丞維詩先成莫以今時寵寧忘昔日恩看花滿眼淚不共楚王言

開元中頒賜邊軍纊衣製於宮中有兵士於短袍中得詩曰沙場征戍客寒若爲眠戰袍經手作知落阿誰邊畜意多添線含情更著綿今生已過也重結後身緣兵士以詩白於帥帥進之玄宗命以詩遍示六宮曰有作者勿隱吾不罪汝有一宮人自言萬死玄宗深憫之遂以嫁得詩人仍謂之曰我與汝結今身緣邊人皆感泣

朱滔括兵不擇士族悉令赴軍自閱於毬場有士子容止可觀進趨淹雅滔自問之曰所業者何曰學爲詩問有妻否曰有卽令作寄內詩援筆立成詞曰握

筆題詩易荷戈征戍難慣從鴛被暖怯向鴈門寒瘦  
盡寬衣帶啼多漬枕檀試留青黛着回日畫眉看又  
令代妻作詩答曰蓬鬢荆釵世所稀布裙猶是嫁時  
衣胡麻好種無人種合是歸時底不歸潛遺以束帛  
放歸

顧況在洛乘門與三詩友遊於苑中坐流水上得大  
梧葉題詩上曰一入深宮裏年年不見春聊題一片  
葉寄與有情人況明日於上游亦題葉上放於波中  
詩曰花落深宮鶯亦悲上陽宮女斷腸時帝城不禁

東流水葉上題詩欲寄誰後十餘日有人於苑中尋  
春又於葉上得詩以示況詩曰一葉題詩出禁城誰  
人酬和獨含情自嗟不及波中葉蕩漾乘春取次行

韓晉公鎮浙西戎昱爲部內刺史

失州名

郡有酒妓善

歌色亦嫵妙昱情屬甚厚浙西樂將聞其能白晉公  
召置籍中昱不敢留餞於湖上爲歌詞以贈之且曰  
至彼令歌必首唱是詞旣至韓爲開筵自持盃命歌  
送之遂唱戎詞曲旣終韓問曰戎使君於汝寄情耶  
悚然起立曰然淚下隨言韓令更衣待命席上爲之

憂危韓召樂將責曰戎使君名士留情郡妓故何不  
知而召置之成余之過乃十笞之命妓與百縑卽時  
歸之其詞曰好去春風湖上亭柳條藤蔓繫離情黃  
鶯久住渾相識欲別頻啼四五聲

韓翃少負才名天寶末舉進士孤貞靜默所與遊皆  
當時名士然而華門圭竇室唯四壁隣有李將

失妓名

柳氏李每至必邀韓同飲韓以李豁落大丈夫故常  
不逆旣久愈狎柳每以暇日隙壁窺韓所居卽蕭然  
良久聞客至必名人因乘間語李曰韓秀才窮甚矣

然所與遊必聞名人是必不久貧賤宜假借之李深  
領之間一日具饌邀韓酒酣謂韓曰秀才當今名士  
柳氏當今名色以名色配名士不亦可乎遂命柳從  
坐接韓韓殊不意懇辭不敢當李曰大丈夫相遇杯  
酒間一言道合尚相許以死況一婦人何足辭也卒  
授之不可拒又謂韓曰夫子居貧無以自振柳資數  
百萬可以取濟柳淑人也宜事夫子能盡其操卽長  
揖而去韓追讓之顧況然自疑曰此豪達者昨暮備  
言之矣勿復致訝俄就柳居來歲成名後數于淄青

節度侯希逸奏爲從事以世方擾不敢以柳自隨置之都下期至而逐之連三歲不果逐因以良金買練囊中寄之題詩曰章臺柳章臺柳往日青青今在否縱使長條似舊垂亦應攀折他人手柳復書答詩曰楊柳枝芳菲節可恨年年贈離別一葉隨風忽報秋縱使君來豈堪折柳以色顯獨居恐不自免乃欲落髮爲尼居佛寺後翅隨侯希逸入朝尋訪不得已爲立功番將沙吒利所劫寵之專房翅悵然不能割會入中書至子城東南角逢犢車緩隨之車中問曰得

非青州韓員外邪曰是遂披簾曰某柳氏也失身沙吒利無從自脫明日尚此路還願更一來取別韓深感之明日如期而往犢車尋至車中投一紅巾苞小合子實以香膏嗚咽言曰終身永訣車如電逝韓不勝情爲之雪涕是日臨淄太校致酒於都市酒樓邀韓韓赴之悵然不樂座人曰韓員外風流談笑未嘗不適今日何慘然邪韓具話之有虞侯將許俊年少被酒起曰寮嘗以義烈自許願得員外手筆數字當立置之座人皆激贊韓不得已與之俊乃急裝乘一

馬牽一馬而馳逕趨沙吒利之第會吒利已出卽以  
入曰將軍墜馬且不救遣取柳夫人柳驚出卽以韓  
札示之挾上馬絕馳而去座未罷卽以柳氏授韓曰  
幸不辱命一座驚歎時吒利初立功代宗方優借大  
懼禍作闔座同見希逸白其故希逸扼腕奪髯曰此  
我往日所爲也而俊復能之立修表上聞深罪沙吒  
利代宗稱歎良久御批曰沙吒利宜賜絹二千匹柳  
氏却歸韓翊後事罷閑居將十年李相勉鎮夷門又  
署爲幕吏時韓已遲暮同職皆新進後生不能知韓

舉目爲惡詩韓邑邑殊不得意多辭疾在家唯末職  
韋巡官者亦知名士與韓獨善一日夜將半韋叩門  
急韓出見之賀曰員外除駕部郎中知制誥韓大愕  
然曰必無此事定誤矣韋就座曰留邸狀報制誥闕  
人中書兩進名御筆不點出又請之且求聖旨所與  
德宗批曰與韓翊時有與翊同姓名者爲江淮刺史  
又具二人同進御筆復批曰春城無處不飛花寒食  
東風御柳斜日暮漢宮傳臘燭輕煙散入五侯家又  
批曰與此韓翊韋又賀曰此非員外詩也韓曰是也

是知不誤矣質明而李與僚屬皆至時建中初也自韓復爲汴職以下開成中余罷梧州有大梁夙將趙唯爲嶺外刺史年將九十矣耳目不衰過梧州言大梁往事述之可聽云此皆目擊之故因錄於此也李相紳鎮淮南張郎中又新罷江南郡素與李構隙事在別錄時於荆溪遇風漂沒二子悲感之中復懼李之讎已投長牋自首謝李深憫之復書曰端溪不讓之詞愚罔懷怨荆浦沈淪之禍鄙實愍然旣厚遇之殊不屑意張感銘致謝釋然如舊交與張宴飲必

極歡醉張嘗爲廣陵從事有酒妓嘗好致情而終不果納至是二十年猶在席目張悒然如將涕下李起更衣張以指染酒題詞盤上妓深曉之李旣至張持杯不樂李覺之卽命妓歌以送酒遂唱是詞曰雲雨分飛二十年當時求夢不曾眠今來頭白重相見還上襄王玳瑁筵張醉歸李令妓夕就張郎中張與楊虔州齊名友善楊妻李氏卽鄜相之女有德無容楊未嘗意敬待特甚張嘗語楊曰我少年成美名不憂仕矣唯得美室平生之望斯足楊曰必求是但與我

同好必諧君心張深信之既婚姝不愜心楊以笏觸之曰君何大癡言之數四張不勝其忿迴應之曰與君無間以情告君君誤我如是何謂癡楊歷數求名從宦之由曰豈不與君皆同邪曰然然則我得醜婦君詎不聞我邪張色解問君室何如曰特甚張大笑遂如初張既成家乃詩曰牡丹一朵直千金將謂從來色最深今日滿闌開似雪一生辜負看花心

劉尚書禹錫罷和州爲主客郎中兼賢學士李司空罷鎮在京慕劉名嘗邀至第中厚設飲饌酒酣命妙

妓歌以送之劉於席上賦詩曰髮鬢梳頭宮樣粧春風一曲杜韋娘司空見慣渾閑事斷盡江南刺史腸李因以妓贈之

太和初有爲御史分務洛京者子孫官顯隱其姓名有妓善歌時稱尤物時太尉李逢吉留守聞之請一見特說延之不敢辭盛粧而往李見之命與衆姬相面李妓且四十餘人皆處其下既入不復出頃之李以疾辭遂罷坐信宿絕不復知怨歎不能已爲詩兩篇投獻明日見李但含咲曰大好詩遂絕詩曰三山

本傳詩  
不見海沉沉豈有仙踪尚可尋青鳥去時雲路斷  
娥歸處月宮深紗窓暗想春相憶書幌誰憐夜獨吟  
料得此時天上月祇應偏照兩人心

博陵崔護姿質甚美而孤潔寡合舉進士下第清明  
日獨遊都城南得居人莊一畝之宮而花木叢萃寂  
若無人扣門久之有女子自門隙窺之問曰誰耶以  
姓字對曰尋春獨行酒渴求飲女人以杯水至開門  
設牀命坐獨倚小桃斜柯佇立而意屬殊厚妖姿媚  
態綽有餘妍崔以言挑之不對目注者久之崔辭去

送至門如不勝情而入崔亦睠盼而歸嗣後絕不復  
至及來歲清明日忽思之情不可抑逕往尋之門墻  
如故而已鎖扃之因題詩於左扉曰去年今日此門  
中人面桃花相映紅人面祇今何處去桃花依舊笑  
春風後數日偶至都城南復往尋之聞其中有哭聲  
扣門問之有老父出曰君非崔護邪曰是也又哭曰  
君殺吾女護驚起莫知所答老父曰吾女笄年知書  
未適人自去年以來常恍惚若有所失比日與之出  
及歸見左扉有字讀之入門而病遂絕食數日而死



本傳詩  
吾老矣此女所以不嫁者將求君子以託吾身今不幸而殞得非君殺之耶又特大哭崔亦感慟請入哭之尚儼然在牀崔舉其首枕其股哭而祝曰某在斯某在斯須臾開日半日復活矣父大喜遂以女歸之

事感第二

天寶末玄宗嘗乘月登勤政樓命梨園弟子歌數闋有唱李嶠詩者云富貴榮華能幾時山川滿目淚沾衣不見祗今汾水上惟有年年秋鴈飛時上春秋已高問是誰詩或對曰李嶠因淒然泣下不終曲而起

曰李嶠真才子也又明年幸蜀登曰衛巖覽眺久之又歌是詞復言李嶠真才子不勝感歎時高力士在側亦揮涕久之

劉尚書自屯田員外左遷朗州司馬凡十年始徵還方春作贈看花諸君子詩曰紫陌紅塵拂面來無人  
不道看花回玄都觀裏桃千樹盡是劉郎去後栽其  
詩一出傳於都下有素嫉其名者白於執政又誣其  
有怨憤他日見時宰與坐慰問甚厚既辭卽曰近者  
新詩未免爲累奈何不數日出爲連州刺史其自叙

云貞元二十一年春余爲屯田員外時此觀未有花  
是歲出牧連州至荆南又貶朗州司馬居十年詔至  
京師人人皆言有道士手植仙桃滿觀盛如紅霞遂  
有前篇以記一時之事旋又出牧於今十四年始爲  
主客郎中重遊玄都蕩然無復一樹唯兔葵燕麥動  
搖動春風耳因再題二十八字以俟後再遊時太和  
二年三月也詩曰百畝庭中半是苔桃花靜盡菜花  
開種桃道士今何在前度劉郎今獨來

元相公積爲御史奉使東川於褒城題黃明府詩其  
序云昔年曾於解縣飲酒余嘗爲觥錄事嘗於竇少  
府廳有一人後至頻犯語令連飛十數觥不勝其困  
逃席而去醒後問人前虞鄉黃丞也此後絕不復知  
元和四年三月奉使東川十六日至褒城望驛有大  
池樓榭甚盛逡巡有黃明府見迎瞻其形容髣髴似  
識問其前銜卽往日之逃席黃丞也說向前事黃生  
惘然而悟因饋酒一樽艤舟請余同載余不免其意  
與之盡歡徧問座隅山水則褒女所奔走城在其左  
諸葛所征之路次其右感今懷古作贈黃明府詩曰

昔年曾痛飲黃令困飛觥席上當時走馬前今日迎  
依稀迷姓字卽漸識平生故友身皆遠他鄉眼暫明  
便邀同榻坐兼共摘一作別船行酒思臨風亂霜稜拂  
地平不看深淺酌貪愴古今情邈迤七盤路陂陁數  
大城花疑褒女咲棧想武侯征一種埋幽石老閑千  
載名

白尚書姬人樊素善歌妓人小蠻善舞嘗爲詩曰櫻  
桃樊素口楊柳小蠻腰年旣高邁而小蠻方豐艷因  
爲楊柳之詞以託意曰一樹春風萬萬枝嫩於金色

軟於絲永豐坊裏東南角盡日無人屬阿誰及宣宗  
朝國樂唱是詞上問誰詞永豐在何處左右具以對  
之遂因東使命取永豐柳兩枝植於禁中白感上知  
其名且好尚風雅又爲詩一章其末句云定知此後  
天文裏柳宿光中添兩枝

李章武學識好古有名於時太和末敕僧尼試經若  
干紙不通者勒還俗章武時爲成都少尹有山僧來  
謁云禪觀有年未嘗念經今被追試前業棄矣願長  
者宥之章武贈詩曰南宗尚許通方便何處心中更

本亭詩  
有經好去苾芻雪水畔何山松栢不青青主者免之  
而去

詩人許渾嘗夢登山有宮室凌雲人云此崑崙也既  
入見數人方飲酒招之至暮而罷賦詩云曉入瑤臺  
露氣清坐中唯有許飛瓊塵心未斷俗緣在十里下  
山空月明他日復夢至其處飛瓊曰子何故顯余姓  
名於人間座上卽改爲天風吹下步虛聲曰善

### 高逸第三

李太白初自蜀至京師舍於逆旅賀監知章聞其名

首訪之旣奇其姿復請所爲文出蜀道難以示之讀  
未竟稱歎者數四號爲謫仙解金龜換酒與傾盡醉  
期不問日由是稱譽光赫賀又見其烏棲曲歎賞苦  
吟曰此詩可以泣鬼神矣故杜子美贈詩及焉曲曰  
姑蘇臺上烏棲時吳王宮裡醉西施吳歌楚舞歡未  
畢西山欲銜半邊日金壺丁丁漏水多起看秋月墮  
江波東方漸高柰樂何或言是烏夜啼二篇未知孰  
是故兩錄之烏夜啼曰黃雲城邊烏欲棲歸飛啞啞  
枝上啼機中織錦秦川女碧紗如煙隔窓語停梭向

人問故夫欲說遼西淚如雨白才逸氣高與陳拾遺  
齊名先後合德其論詩云梁陳以來艷薄斯極沈休  
文又尚以聲律將復古道非我而誰與故陳李二集  
律詩殊少嘗言與寄深微五言不如四言七言又其  
靡也況使束於聲調俳優哉故戲杜曰飯顆山頭逢  
杜甫頭戴笠子日卓午借問何來太瘦生總爲從前  
作詩苦蓋譏其拘束也玄宗聞之召入翰林以其才  
藻絕人器識兼茂便以上位處之故未命以官嘗因  
宮人行樂謂高力士曰對此良辰美景豈可獨以聲

伎爲娛倘時得逸才詞人詠出之可以誇耀於後遂  
命召白時寧王邀白飲酒已醉旣至拜舞頽然上知  
其薄聲律謂非所長命爲宮中行樂五言律詩十首  
白頓首曰寧王賜臣酒今已醉倘陛下賜臣無畏始  
可盡臣薄技上曰可卽遣二內臣掖扶之命研墨濡  
筆以授之又令二人張朱絲欄於其前白取筆杼思  
畧不停綴十篇立就更無加點筆迹適利鳳跕龍掣  
律度對屬無不精絕其首篇曰柳色黃金嫩梨花自  
雪香玉樓巢翡翠金殿宿鴛鴦選妓隨雕輦徵歌出

本傳言  
洞房宮中誰第一飛燕在昭陽文不盡錄常出入宮  
中恩禮殊厚竟以踈縱乞歸上亦以非廊廟器優詔  
罷遣之後以不羈流落江外又以永王招禮累謫於  
夜郎及放還卒於宣城杜所贈二十韻備叙其事讀  
其文盡得其故跡杜逢祿山之難流離隴蜀畢陳於  
詩推見至隱殆無遺事故當時號爲詩史

杜舍人牧弱冠成名當年制策登科名振京邑嘗與  
一二同年城南遊覽三公寺有禪僧擁褐獨坐與  
之語其玄言妙旨咸出意表問杜姓字具以對之又

云修何業傍人以累捷誇之顧而笑曰皆不能也杜  
歎訝因題詩曰家在城南杜曲傍兩枝仙桂一時芳  
禪師都未知名姓始覺空門意味長

杜爲御史分務洛陽時李司徒罷鎮閑居聲伎豪華  
爲當時第一洛中名士咸謁見之李乃大開筵席當  
時朝客高流無不臻赴以杜持憲不敢邀置杜遣座  
客達意願與斯會李不得已馳書方對花獨酌亦已  
酣暢聞命遽來時會中已飲酒女奴百餘人皆絕藝  
殊色杜獨坐南行瞪目注視引滿三卮問李云聞有

本傳言  
紫雲者孰是李指示之杜凝睇良久曰各不虛得宜  
以見惠李俯而笑諸妓亦皆迴首破顏杜又自飲三  
爵朗吟而起曰華堂今日綺筵開誰喚分司御史來  
忽發狂言驚滿座兩行紅粉一時迴意氣閑逸傍若  
無人杜登科後狎遊飲酒爲詩曰落拓江湖載酒行  
楚腰纖細掌中情三年一覺揚州夢贏得青樓薄倖  
名後又題詩曰航船一棹百分空十載青春不負公  
今日鬢絲禪榻畔茶煙輕颺落花風

怨憤第四

宋考功天后朝求爲北門學士不許作明河篇以見  
其意末云明河可望不可親願得乘槎一問津更將  
織女支機石還訪成都賣卜人則天見其詩謂崔融  
曰吾非不知之問有才調但以其有口過蓋以之問  
患齒疾口常臭故也之問終身慚憤  
吳武陵有文筆才而強悍激訐爲人所畏嘗爲部內  
刺史賊罪狼籍敕令廣州幕吏鞠之吏少年科第殊  
不假貸持之甚急武陵不勝其憤題詩路左佛堂曰  
雀兒來逐颺風高下視鷹鷂意氣豪自謂能生千里

冀黃昏依舊入蓬蒿

開元末宰相李適之踈直坦夷時譽甚美李林甫惡之排誣罷免朝客來雖知無罪謁問甚稀適之意憤日飲醇酎且爲詩曰避賢初罷相樂聖且銜杯爲問門前客今朝幾箇來李林甫愈怒終遂不免

張曲江與李林甫同列玄宗以文學精識深器之林甫嫉之若讎曲江度其巧譎慮終不免爲海燕詩以致意曰海燕何微眇乘春亦暫來豈知泥滓濺祇見玉堂開綉戶時雙入華軒日幾迴無心與物競鷹隼

莫相猜亦終退斥

化里鑿池種竹起臺榭時方下第或謂執政惡之故不在選怨憤尤極遂於庭內題詩曰破却千家作一池不栽桃李種薔薇薔薇花落秋風後荆棘滿庭君始知由是人皆惡其侮慢不避故卒不得第憾而終

徵異第五

開元中有幽州衙將姓張者妻孔氏生五子不幸去世復娶妻李氏悍怒狠戾虐遇五子日鞭箠之五子不堪其苦哭於其葬母忽於塚中出撫其子悲慟久



本傳記  
之因以白布巾題詩贈張曰不忿成故人掩涕每盈  
巾死生今有隔相見永無因匣裏殘粧粉留將與後  
人黃泉無用處恨作塚中塵有意懷男女無情亦任  
君欲知腸斷處明月照孤墳五子得詩以呈其父其  
父慟哭訴於連帥帥上聞敕李氏杖一百流嶺南張  
停所職

宋考功以事累貶黜後放還至江南遊靈隱寺夜所  
極明長廊吟行且爲詩曰鷲嶺鬱岩堯龍宮隱寂寥  
第二聯搜奇思終不如意有老僧點長明燈坐大禪

牀問曰少年夜夕久不寐而吟諷甚苦何邪之問答  
曰弟子業詩適偶欲題此寺而興思不屬僧曰試吟  
上聯卽吟與之再三吟諷因曰何不云樓觀滄海日  
門聽浙江潮之問愕然訝其適麗又續終篇曰桂子  
月中落天香雲外飄捫蘿登塔遠剝木取泉遙霜薄  
花更發水輕葉未凋待入天台路看余度石橋僧所  
贈句乃爲一篇之警策遲明更訪之則不復見矣寺  
僧有知者曰此駱賓王也之問詰曰當敬業之敗與  
賓王俱逃捕之不獲將帥慮失大魁得不測罪時死

者數萬人因求戮二人者函首以獻後雖知不死不敢捕送故敬業得爲衡山僧年九十餘乃卒出趙魯遊南嶽  
記賓王亦落髮徧遊名山至靈隱以周歲卒當時雖敗且以匡復爲名故人多護脫之

韓吏部作轅轅彌明傳言嘗與文友數人會宿有老道士形貌瓌異自通姓名求宿言論甚竒旣及飲酒衆度其必不留情於詩因聯句詠鑪中石罌將已困之其首唱曰妙匠珠山骨剗中事調烹至彌明自云不善俗書書則人多不識遣人執筆吟曰龍頭縮菌

蠢豕腹漲膨脗座客無不歎異會人思竭不能復續彌明連足成之有微吟者其聲淒苦彌明詠中譏侮之曰仍於蚯蚓窟更作蒼蠅聲狀罌之聲旣已酷似譏微吟者亦復著題皆大驚伏須臾倚壁而睡鼻中大鼾其聲如雷座人異且畏之咸避就寢旣明失之莫知所在

元相公積爲御史鞠獄梓潼時白尚書在京與名輩遊慈恩小酌花下爲詩寄元曰花時同醉破春愁醉折花枝當酒籌忽憶故人天際去計程今日到梁州

本專詩  
時元果及褒城亦寄夢遊詩曰夢君兄弟曲江頭也  
向慈恩院裡遊驛吏喚人排馬去忽驚身在古梁州  
千里神交合若符契友朋之道不期至歟  
馬相植罷安南都護與時宰不通又除黔南殊不得  
意維舟峽中古寺寺前長堤堤畔林木夜月甚明見  
人白衣緩步堤上吟曰截竹爲筒作笛吹鳳凰池上  
鳳凰飛勞君更向黔南去卽是陶鈞萬類時歷歷可  
聽吟者數四遣人邀問卽已失之後自黔南入爲大  
理卿遷刑部侍郎判鹽鐵遂作相

徵咎第六

詩人劉希夷嘗爲詩曰今年花落顏色改明年花開  
復誰在忽然悟曰其不祥歟復遣思逾時又曰年年  
歲歲花相似歲歲年年人不同又惡之或解之曰何  
必其然遂兩留之果以來春之初下世  
崔曙進士作明堂火珠詩贖帖曰夜來雙月滿曙後  
一星孤當時以爲警句及來年曙卒唯一女名星星  
人始悟其自讖也

范陽盧獻卿大中中舉進士詞藻爲同流所推作愍

本專言  
征賦數千言時人以爲庾子山哀江南之亞今諫議大夫司空圖爲注之連不中第薄遊衡湘至郴而病夢人贈詩曰卜築郊原古青山唯四鄰扶踈遶臺榭寂寞獨歸人後旬日而歿郴守爲葬之近郊果以夏初窆皆符所命

嘲戲第七

宋武帝嘗吟謝莊月賦稱歎良久謂顏延之曰希逸此作可謂前不見古人後不見來者昔陳王何足尚邪延之對曰誠如聖旨然其曰美人邁兮音信闕隔

千里兮共明月知之不亦晚乎帝深以爲然及見希逸希逸對曰延之詩云生爲長相思歿爲長不歸豈不更加於臣邪帝拊掌竟日

國初長孫太尉見歐陽率更姿形麼陋嘲之曰聳膊成山字埋肩畏出頭誰言麟閣上畫此一獼猴詢亦酬之曰索頭連背暖漫襠畏肚寒祗緣心混混所以面團團太宗聞之而笑曰詢此嘲會不爲皇后邪則天朝左司郎中張元一滑稽善譴時西戎犯邊則天欲諸武立功因行封爵命武懿宗統兵以禦之寇

本事詩  
未入塞懿宗始逾邠郊畏懦而遁懿宗短陋元一嘲之曰長弓短度箭蜀馬臨高蹠去賊七百里隈墻獨自戰忽然逢着賊騎猪向南趨則天聞之初未悟曰懿宗無馬邪何故騎猪元一解之曰騎猪者是夾豕走也則天乃大笑懿宗怒曰元一夙構貴欲辱臣則天命賦詩與之懿宗請賦奉字元一立嘲曰裏頭極草草掠髮不葦葦未見桃花面皮先作杏子眼孔則天大歡故懿宗不能侵傷

開元中宰相蘇味道與張昌齡俱有名暇日相遇互相誇誚昌齡曰某詩所以不及相公者爲無銀花合故也蘇有觀燈詩曰火樹銀花合星橋鐵鎖開暗塵隨馬去明月逐人來味道云子詩雖無銀花合還有金銅釘昌齡贈張昌宗詩曰昔日浮丘伯今同丁令威遂相與拊掌大笑

詩人張祜未嘗識白公白公刺蘇州祜始來謁才見白白曰久欽籍嘗記得君欵頭詩祜愕然曰舍人何所謂白曰鴛鴦鈿帶拋何處孔雀羅衫付阿誰非欵頭何邪張頓首微笑仰而答曰祜亦嘗記得舍人目

本事詩  
連變白曰何也祐曰上窮碧落下黃泉兩處茫茫皆  
不見非日連變何邪遂與歡宴竟日

沈佺期會以罪謫遇恩官還秩朱紱未復嘗內宴羣  
臣皆歌迴波樂撰詞起舞因是多求遷擢佺期詞曰  
迴波爾時佺期流向嶺外生歸身名已蒙齒錄袍笏  
未復牙緋中宗卽以緋魚賜之崔日用爲御史中丞  
賜紫是時佩魚須有特恩內宴中宗命羣臣撰詞曰  
臺中鼠子直須諳信足跳梁上壁龕倚翻燈暗污張  
五還來齧帶報韓三莫浪語其王相大家必欲賜金

龜賣卻貓兒相報上中宗亦以緋魚賜之

中宗朝御史大夫裴談崇奉釋氏妻悍妬談畏之如  
嚴君嘗謂人妻有可畏者三少妙之時視之如生菩  
薩及男女滿前視之如九子魔母安有人不畏九子  
母耶及五十六十薄施糕粉或黑視之如鳩盤荼安  
有人不畏鳩盤荼時韋庶人頗襲武氏之風軌中宗  
漸畏之內宴唱迴波詞有優人詞曰迴波爾時栲栳  
怕婦也是大好外邊祇有裴談內裏無過李老韋后  
意色自得以束帛賜之

續本事詩

聶奉先

市語

今時市語答人真實事則稱見來此語蓋已久矣坡  
贈黃山人詩云面頰照人元自白眉毛覆眼見來烏  
以此

甘露事

杜牧之集有李給事詩二首其中有紛紜白晝驚千  
古鐵鎖朱殷幾一空之句謂鄭注甘露之事也

禁酒

盧仝詩云何時得去禁酒國今吾謫嶺南萬戶酒家  
有一婢昔嘗為酒肆頗能伺候多煖自今當不乏酒  
可以日飲之何其去禁酒國矣

軟紅

前輩戲云有西湖風月不如東洛軟紅香塵之語故  
東坡和錢穆公蔣穎叔從駕景雲官詩云半白不嗟  
垂項髮軟紅猶戀屬車塵

冰廳

冰廳事見因話錄云歐陽有詩云獨宿冰廳夢帝闕

紅麴酒

余疑李賀云酒滴珍珠紅夏彥剛云江南人造紅麴  
酒

葡萄酒

白樂天云羌管吹楊柳燕姬酌葡萄謂太原出葡萄  
酒也然此乃律詩用平聲讀則太不律用側聲讀則  
近俗耳

芡實



續本事詩  
京師芙蓉最盛於會靈觀之凝祥池故文忠詩曰凝祥池鎖會靈觀滯留江海得加餐僕射坡在鄭州世亦稱其芙蓉也

醪醑

醪醑本酒名也新開花本以其顏色似之故以取名山谷所以有名字因壺酒風流付枕幃之句又云風流徹骨成春酒夢寐宜人入枕囊

詩媒

詩云白藕作花風已愁不堪殘睡更回頭晚雲帶雨

歸飛急本作西窓一夜秋此趙璘細君王氏所作也德遴既鰥居因見此篇遂與之爲親余以爲乃二十八字媒也

海棠

東坡謫黃州居於定惠院之東雜花滿山而獨有海棠一株士人不知貴東坡爲作長篇平生喜爲人寫蓋人間刊石者自有五六本云吾平生最爲得意詩也

筆管詩

續本事詩  
唐德州刺史王倚家有筆一管粗於常筆刻從軍行人馬毛髮亭臺山水無不精絕判兩句曰亭前琪樹已堪攀塞北征人尚未還

白鴈

北方白鴈似鴈而少色白秋深乃來白鴈至則霜降河北人謂之霜信杜甫詩云故國霜前白鴈來卽謂此

簿尉

杜甫贈高適詩云脫身簿尉中始與楚辭韓退之

免張功曹詩云判司卑官不堪說未免捶楚塵埃間杜牧寄小姪阿宜詩云叅軍與簿尉塵土驚皇皇一語不中治鞭捶身滿瘡以此明唐之叅軍簿尉有過卽受笞杖之刑尤今之楚吏也

槐黃

俗云槐花黃舉子忙謂槐之方花乃進士赴舉之時而唐詩人翁承贊詩云雨中粧點望中黃勾引蟬聲送夕陽憶得當年隨計吏馬啼終日爲君忙乃知俗語亦有所自也

續本學記

四

